

# INUIT ATAQATIGIIT

## Inatsisartuni



UKA20/ 21&22  
06.10.20.  
Peter Olsen

**Uunga siunnersuut: Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisaat nr. x, xx. xxx 2020-meersoq**

**Uunga siunnersuut: Pigisanit pissarsiat ilaasa akileraaruserneqartarnerat pillugu Inatsisartut inatsisaata allanngortinneqarneranik Inatsisartut inatsisaat nr. x, xx. xxx 2020-meersoq**

(Aningaasaqarnermut Naalakkersuisoq)

Aningaasaqarnermut naalakkersuisup, naalakkersuisut sinnerlugit saqqummiuteqqammerpai, aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisissaattut siunnersuut aammalu pigisanit pissarsiat ilaasa akileraaruserneqartarnerat pillugu Inatsisartut inatsisaata allanngortinneqarneranik Inatsisartut inatsisissaattut siunnersuut.

Naalakkersuisup nammineq oqarneratut, siunnersuutit malittarisassanut atuuttunut allannguutininik arlalinnik imaqarput.

Inatsisinik pioreersunik nutarterinerupput, ersarissaatanerullutillu (præcisering), teknikkimullu tunngasupilerujussuullutik

Naatsumik oqaatigissaganni inatsisissatut siunnersuutaasut taakku marluk, tassaapput soraarnerussutisiaqartarnermut aammalu suliffeqarfiit akileraarutaasa appaavigineqarsimaneranut tunngasoq.

Torrutiinnavillugu oqaatigereersinnaavarput imm. 21-mi suliffeqarfiit akileraarutaannik appartitsisimanermut tunngasoq itigartipparput, aappaali soraarnerussutisiaqartarnermut tunngasoq akuerlutigu.

Taamaakkaluartorli pinngitsoorusunngilagut qulaani pineqartut pillugit Inuit Ataqatigiinniit naatsumik imatut oqaaseqaateqassalluta;

Soraarnerussutisiaqartitaanermut - utoqqalinersiaqartitaanermut tunngatillugu utoqqartatta ullumikkut nunatsinni atugaat akuersaarsinnaannginnatsigit, ataatigut issusuumik Inuit Ataqatigiinniit naqissuserusupparput.

Piffissanngorpoq alloriaqqinnissamut ingerlariaqqinnissamullu, piffissanngorpoq nunatta utoqqaliffigissallugu orniginartup, nuannersup kajuminnartullu pilersinneqarnissaa. Nunatta utoqqaliffigissallugu orniginartup, nuannersup kajuminnartullu piaarnerpaamik pilersinneqarnissaa Inuit Ataqatigiinniit peqataaffigerusupparput.

Tamanna pillugu, nunatta utoqqaliffigissallugu orniginartup, nuannersup kajuminnartullu pilersinneqarnissaa siunertaralugu ukiaq manna Inuit Ataqatigiit sinnerlugit Aqqa Samuelson oqaluuserisassamik siunnersuuteqarnikummat; siunnersuummilu siunertaalluni

anguniagassaallunilu utoqqalinersiaqartititsinerup, - soraarnerussutisiaqartitaanerup tungaatigut nunatsinni pitsanngorsaasoqarnissaa; utoqqalinersiat, ikiorsiissutaannaajunnaarlugit utoqqalinersiavinnngortinneqarnissaat siunertaalluni, tassa imaappoq qallunaat nunaanni soraarnerussutisiaqartitsinermut assingusumik nunatsinni aaqqissuussisoqalernissaanik siunertaqartumik Aqqa Samuelson Inuit Ataqatigiit sinnerlugit oqaluuserisassamik siunnersuuteqarnikuuvoq.

Utoqqartata atugaannut tunngatillugu alloriaqqinissamut piffissanngorpoq; Qilanaarpugullu oqalliseqataanissatsinnut.

Aappaattut. Suliffeqarfiit akileraarutaasa appartinneqarsimanerannut tunngasoq naatsumik oqaaseqarfigilaassavarput; Nassueritigissavarput aamma kikkut tamarmik ilikkariinnguatsiarmassuk, tassalu suliffeqarfiit akileraarutaasa appartinneqarnissaanut tunngasoq uagut piniartorsuusugutta piniagassatsitut pingaarnertut isiginnginnatsigu. Piniagassatsialaangitsutut isigaarput. Pisineqarneratigut ulluinnarni inuussuutissat nalingiinnaasut akitsortinneqarput, inuinnaasuunullu ulluinnarni inuuniarneq artornarnerulerpoq akisunerulerlunilu, tamaattumik...;

Pisarinaveersaagassatut Inuit Ataqatigiinniit isigaarput; Inuit Ataqatigiinniit ersarissumik oqaatigissavarput, isumaqatiginnginnatsigu innuttaasut atukkamikkut ilungersoreersut kaasarfiiit aallerluni, peqareersut peqarnerulernissaannik Naalakkersuisooqatigiit pingaarnersiuisimmata.

Suliffeqarfiit akileraarutaasa appartinneqarneratigut nunatta karsiata 2020-mi katillugu 54 mio.kr-nik annaasaqarfigisussaavaa; Namminersorlutik Oqartussat 29 mio.kr annaassavaat kommunillu tallimaasut katillugu 25 mio.kr-nik annaasaqarfigissallugu.

Sermersooq 9 mio.kr. annaasaqassaaq, Kujalleq 3 mio.kr Avannaata kommunea 5 mio.kr. Qeqqata kommunea 4 mio.kr. Qeqertalillu 3 mio.kr-nik annaasaqarnissaa missingersuusiortoqarsimalluni.

Aningaasat katillugit 54 mio.kr aningaasarpasuit inuit atugarlioreeqqisut pitsaanerusumik atugaqalernissaannut atorneqarsinnaagaluartut.

Taamaattumik imm. 21-mi suliffeqarfiit akileraarutaannik appartitsisimanermit tunngasoq itigartipparput.

Utoqqalinersianut katersisussaataitanermit apeqqut, ukioq innuttaasorpassuarput imaannaangitsumik aqquusaagaqarfiusoq, sulilu qulaajarlugi aaqqiivigissallugulu naammassineqanngitsoq, ataatsimiitsitaliap suliaqarnermini ilanngullugu sammissagaa inassutigaarput.

Qujanaq

Peter Olsen  
Inuit Ataqatigiit